



## Wulfla.

### 1.

9 Sva nu bidjaiþ jus: Atta unsar þu in himinam, veihnai namo þein; 10 qimai þiudinassus þeins; vairþai vilja þeins sve in himina jah ana airþai; 11 hlaif unsarana þana sinteinan gif uns himma daga; 12 jah aflet uns þatei skulans sijaima, svasve jah veis afletam þaim skulam unsaraim; 13 jah ni briggais uns in fraistubnjai, ak lausei uns af þamma ubilin, unte þeina ist þiudangardi jah mahts jah vulþus in aivins. amen.

Matth. 6, 9—13.

### 2.

1 Jah aftra Iesus dugann laisjan at marein. jah galesun sik du imma manageins filu, svasve ina galeiþbandan in skip gasitan in marein, jah alla so managei viþra marein ana stapa vas. 2 jah laisida ins in gajukom manag, jah qaþ im in laiseinai seinai: 3 hauseiþ! sai urrann sa saians du saian fraiva seinamma. 4 jah varþ miþþanei saiso, sum raihtis gadraus faur vig, jah qemun fuglos jah fretun þata. 5 anþaruþ þan gadraus ana stainamma, þarei ni habaida airþa managa, jah suns urrann, in þizei ni habaida diupaizos airþos; 6 at sunnin þan urrinandin ufbrann, jah unte ni habaida vaurtins, gaþaursnoda. 7 jah sum gadraus in þaurnuns, jah ufarstigun þai þaurnjus jah afhvapidedun þata, jah akran ni gaf. 8 jah sum gadraus in airþa goda, jah gaf akran urrinnando jah vahsjando, jah bar ain .l jah ain .j. jah ain .r. 9 jah qaþ: saei habai ausona hausjandona, gahausjai. 10 iþ biþe varþ sundro, frehun ina þai bi ina miþ þaim tvalibim þizos gajukons.

Mark. 4, 1—10.